

MOVIMIENTO ELECTORAL DI PUEBLO



Programa di Accion:  
NOS FUTURO 2009 - 2013



MEP NOS FUTURO

"MEP, PA BO FUTURO GARANTISA"



# MEP

2009-2013



## Contenido

- Credo di MEP
- Introduccion Lider di MEP
- Asuntonan General
  - Structura Estatal
  - Telecomunicacion y Energia
  - Maneho di Inovacion y Technologia
  - Aparato Gubernamental
- Husticia y Seguridad
  - Maneho di Estranheria
  - Integracion
- Economia y Turismo
  - Inversion y Diversificacion di nos Economia
  - Stimula inversion publico
  - Reduci Desempleo
  - Turismo
  - Controla Costo di Bida
- Finanzas Publico
  - Baha Gastonan di Gobieno na un Manera Responsabel
  - Trece un Reparticion mas Husto di e Peso di Impuesto
- Enseñansa, Cultura, Asuntonan Social y Infrastructura
  - Maneho di Enseñansa
  - Cultura
  - Maneho Social
  - Maneho di Infrastructura
- Salubridad Publico, Bienestar General y Deporte
  - Salubridad Publico
  - Bienestar general y Deporte
  - Adiccion
- Mercado Laboral
- Planificacion di Espacio, Medio Ambiente y Vivienda



## Credo di MEP

Como partido social democrata, Movimiento Electoral di Pueblo  
tin e siguiente puntonan di salida;  
Promove husticia social, fomenta solidarismo y garantisa libertad;  
Stimula firmemente e idea cu educacion ta e instrumento  
fundamental pa un desaroyo sostenible y duradero.  
Di e forma aki e individuo tambe ta desaroya su mes y por logra  
un trabou digno y productivo den comunidad. Esaki ta stimula  
igualdad den oportunidad pa desaroyo y empleo pa un y tur;  
Tur hende mester disfruta di su derechonan basico democratico  
anca den nos leynan y tratadonan;  
Tur yiu di e pueblo aki mester por haya oportunidad igual pa  
dirigi nos pais, sin distincion alguno;  
Patrimonio di pueblo, manera **SETAR, WEB, ELMAR, FCCA,**  
**AEROPUERTO, WAF, SERLIMAR y HOSPITAL na San Nicolas** ta keda cien  
prociento den man di Pueblo Arubano;  
Sirbi interes general den un gobierno di pueblo y pa pueblo.  
Un gobierno cu mester keda den man di pueblo y no den  
man di algun podernan economico ageno;  
E beneficionan di estado mester ser reparti hustamente entre  
tur ciudadano, en particular entre esnan di menos recurso;  
Ningun persona den nos comunidad por wordo descrimina pa  
motibo di su status economico, sexo, religion, rasa, color,  
descendencia of pa cualquier otro motibo.  
Gobierno mester keda stimula e respet pa nos norma y balornan.  
Como Cristian nos ta busca guia cerca nos Creador pa ser bon  
ciudadano di nos pais. E base fundamental ta respet pa leynan di Dios.



**100% MEP**

## Introducción

Na víspera di elección 2009, cu sumo placer Movimiento Electoral di Pueblo (MEP) ta presenta na Pueblo di Aruba su puntonan di acción pa gobernación 2009-2013. Promer cu mi bairiba e puntonan aki, mi no por keda sin resumi en corto con MEP a haya e país aki na año 2001 y con nos a derecha e país aki, te na unda nos ta awe. Loke a resalta ta cu MEP a bin haya un gobierno financieramente na suela, causa pa e debenan grandi di garantian y tambe basa ariba e hecho cu diferente patrimonio di pueblo manera Setar, FCCA y Utilities NV y diferente scolnan tawata cla pa wordo hipoteca of bendi cu podernan ageno. Ni nos oro na Banco Central, a scapa nan. Den un lucha duro nos a logra scapa nos patrimonio. Nos por mira awe cu bou gobernación di MEP, nos tin instancian manera Setar y Aeropuerto cu a bira un ehempel pa nos region y awor ta cien porciento di pueblo. Tambe nos ta mira cu poco poco FCCA ta birando atrobe e institucion pa nos hendenan di menos recurso por bolbe haya cas social cu casi a bay perdi door di compra di un banco bacarota, esta INTERBANK. Tambe nos por a mira con durante di gobernación di MEP, nos finansas publico ta controlable atrobe, después cu mester a evita cu Aruba a wordo bendi ariba mercado di capital door di Italianonan, pa motibo di e afamado garantian cu tabata tin nos Pueblo hipoteca. Nos por mira con nos turismo ta florece atrobe y mas cadenanan hotelero prestigioso ta bai cuminsa traha hotelnan di cinco strea na Aruba manera Riu, Ritz Carlton, Sol Melia y Fairmount na Sero Colorado. Tur esaki ta mustra riba e hecho cu nan tin confiansa den e producto Aruba atrobe. Otro aspecto cu nos a mira ta cu MEP, asina cu nos a drenta gobierno, a cuminsa derecha careteranan na cantidad, por medio di e asina yama "wegenfonds". Riba e tereno social, nos a aumenta minimumloon te na 1542 florin pa luna y ta nos proposito pa hisa esaki te na Afl. 2000,- den e siguiente gobernación. Nos a traha cas di anciano na Paradera y actualmente nos ta trahendo un cas di anciano super moderno pa nos gran dinan na San Nicolas. Nos a traha un Centro Ortopedagogico pa hobennan cu problemanan emocional. Tambe ariba tereno di Salud Publico, nos governo a bini cu un Centro Medico na San Nicolas. Pa loke ta deporte nos ta e gobierno cu a haci mas hopi pa deporte e ultimo decadanan aki. Awe Aruba conoce un parke di recreo na Jaburibari, stadiionnan nobo manera na Noord, Santa Cruz, Burubundo, Simeon Antonio y Savaneta. Tambe ariba tereno cultural nos a percura pa lanta e sentimento Arubiano den nos país por medio di Himno y Bandera, musica folclor y nos bailenan tradicional. Tur esaki y mucho mas, ta testimonio na pueblo cu nos gobierno a traha. Algun tópico cu sigur nos lo kier caba den e proximo gobernación ta e bahamento di interés ariba e mercado di capital, e mudamiento di WAF pa Barcadera, e proyecto di Caya Grandi, crea mas eficiencia y profesionalisa aun mas Salubridad Publico.

Despues di a goberna Aruba den un forma tranquila, yen di logronan grandi, nos partido ta drenta awor cu hopi entusiasmo den e campaña electoral 2009.



MEP ta califica e campana aki como un referendum pa determina si Arubianonan ta keda doño di e pida baranca aki y mustra mundo cu nos mes por guia nos pais y trece cambio na unda ta necesario, of ta entrega tur e podernan estatal bek na Hulanda of Union Europeo den un forma di UPG of den estilo di e islanan-BES (Boneiro, St. Estatius y Saba), y nos lo perde nos autonomia.

Durante e siguiente gobernacion 2009-2013, lo mester atende riba dos nivel, esta riba nivel di Reino Hulandes y riba nivel nacional di Aruba mes. Pa loke ta trata nivel di Reino Hulandes, MEP ta firmemente di opinion cu e escogencia cu Aruba a haci na Conferencia di Mesa Rondo na 1983 pa cu nos Status Aparte, ta basa ariba e hecho cu nos ta convenci cu nos mes por goberna nos pais. Nos tin suficiente hendenan capacita y cu experencia pa goberna y si ta necesario pa coregi cualquier eror cu por a wordo haci. Aruba su portanan semper ta habri, sperando riba nos profecionalnan cu ta studiando den exterior, asina cu nan caba cu nan estudio. Aunque cu nos ta habri pa tur conseho-nan, cu bon intencion, di expertonan internacional, nos mes ta capas pa tuma decision pa futuro di nos pais. E conviccion aki aparentemente nos opositornan politico no tin, mirando e hecho cu ta expertonan Hulandes ta dicta nan vision y programacion politico.

Basicamente loke MEP ta para p'é riba tereno estatal ta anca den e principionan di Statuut di Reino Hulandes, na unda cada isla di Antiyas tin su mes un autonomia interno den Reino Hulandes. Esaki ta nifica cu ningun parlamento den Reino Hulandes; ni Tweede Kamer di Hulanda, ni Parlamento di Aruba, ni Parlamento di Antiyas Hulandes, por manda ariba ningun otro gobierno den Reino Hulandes. **E PODER AKI TA KEDA UNICAMENTE DEN MAN DI E PARLAMENTO DI E PAIS CONCERNII!**

Tendencianan cu nos ta mirando awor den Reino Hulandes ta e hecho cu, debi na un situacion precario di Antiyas Hulandes y e problemanan riba tereno di criminalidad cu Antiyanonan Hulandes na Hulanda, gobierno Hulandes a stimula un desintegracion total di Antiyas Hulandes, na un manera cu ningun dia, pueblo Antiyano den su totalidad a pidi pé. Gobierno Hulandes ta pone presion riba Aruba pa nos bai den e mesun direc-cion. MEP lo bringa te na ultimo pa esaki no sosode. MEP a duna Hulanda di conoce cu nos no lo acepta un desaroyo asina y cu nos kier bin cu un discusion ariba interpretacion di articulo 43 lid 1 y 2 pa nos mustra Reino Hulandes cu e ta actua contra di Statuut. MEP simplemente ta exigi respet pa loke a wordo acorda den Reino Hulandes y vigente desde nos Status Aparte na 1986.

MEP su vision ta pa mantene lasonan estatal y politico sano cu e paisnan den Reino. E relacion aki mester ta basa riba respet mutuo, consenso politico y cooperacion cu otro. Pa tal motibo MEP ta contento cu e symposio cu Reino Hulandes kier organisa riba futuro structura estatal di e paisnan den Reino. Banda di e lasonan estatal cu Reino Hulandes,

MEP lo intensifica su contactonan cu tanto e region Caribense como paisnan di Norte America, America Central y Sur America. MEP lo sigui e desaroyonan di integracion eco-nomico mundial y regional di cerca y lo sa di balora e bentahanan cu esakinan por tin pa Aruba. MEP ta di opinion cu, maske desaroyonan Europeo ta importante pa futuro di Aruba, nos mester sigui e desaroyonan regional tambe cu hopi atencion.



Pa loke ta trata e nivel nacional, MEP ta para pa un gobernacion durante di 2009-2013, basa riba un desaroyo sostenibel y duradero. MEP no solamente ta sigui desaroyo riba termino cortico, pero tambe ta pone su miras riba termino mas largo. Pa tal motibo MEP a instala un grupo di trabou, consistiendo di tur partnernan social hunto cu oficialnan di gobierno pa analysa e desaroyonan te cu 2025 y kiko gobierno lo mester haci pa guia e desaroyonan aki mas responsabel y equilibra cu ta posibel.

MEP ta kere den un cambio di paradigma, na unda tur ministerionan di gobierno mester wordo dirigi por medio di e concepto di un desaroyo sostenibel y duradero. E palabra "partnership" ta e palabra magico di MEP pa yega na un desaroyo socio-economico equilibra. Esaki kier meen cu cada decision di gobernacion cu ta wordo tuma encuanto desaroyo di Aruba, mester por wordo carga financieramente pa e presupuesto di gobierno y e mester crea prosperidad pa pueblo di Aruba. Basa riba e concepto aki, nos a yega na e slogan cu nos campana electoral ta hiba, esta "MEP, PA BO FUTURO GARANTISA". Pues, e programa di MEP ta wordo presenta cu miras riba un futuro garantisa tanto pa generacion actual, como esunna despues.

Den e periodo 2009-2013, MEP como partido social democrata, siendo e partido maximo di pueblo y pa pueblo, lo atende en todo caso e siguiente puntonan di prioridad den e prome aña di gobernacion :

- Solciona problemanan relaciona cu nos refineria;
- Fortifica nos mercado di turismo, creando entre otro un strip di recreo y actividad for di aeropuerto te cu Malmok;
- Crea y mantene suficiente cuponan di trabou pa tur hende aki na Aruba;
- Re-introduccion di un scol di ofishi, en particular pa nos hobennan (antes yama ambachtschool);
- Introduci un sistema di "micro credito" cu cooperacion di Volkskredietbank y AIB pa empresanan chiquito y esnan di poco recurso;
- Realisa mudamento di waf comercial di Oranjestad pa Barcadera;
- Implementa Ley di Enseñansa Obligatorio;
- Implementa den forma di partnership cu sector priva e proyecto di "Down Town Development" (caya grandi di Oranjestad);
- Crea oportunidad pa aplica energia alternativo, eliminando obstaculonan cu ta stroba e uzo di esaki, inicia un estudio piloto di iluminacion solar pa tur bario, cum insando na San Nicolas;
- Percura pa mas seguridad pa nos pueblo, bringando criminalidad mas intensiva mente, introduciendo medidanan preventivo y represivo;
- Introduci servicio militar/social obligatorio pa nos hobennan;
- Expande e capacidad di cuido y luga pa rehabilitacion di nos adictonan y ubica institutonan di cuido den regionnan cu ta combini tanto e paciente como e poblacion di Aruba.
- Stimula reduccion di interes riba prestamo na banco.



MEP ta un partido grandi y respeta cu peso politico y cu mas aña di experiencia den gobernacion cu tur otro partido politico aki na Aruba. A pesar cu desaroyonan economico mundial lo forma un reto grandi pa e periodo di gobernacion 2009-2013, nos ta compromete nos mes na ehecucion di nos programa. MEP ta consisti di homber y muhernan balente, cu experiencia, yen di energia y ideanan creativo y innovativo pa enfrenta tur reto di gobernacion. Den situacion di crisis economico mundial pueblo por confia e pais aki den man di un solo partido; esta Movimiento Electoral di Pueblo, MEP.

Tur proyecto di gobierno ta ser evalua pa determina si e ta cumpli cu e maneho di gobierno y si e ta financieramente alcansabel. Basa riba un sistema cu normanan presupuestario y financiero, lo determina e cantidad di proyectonan y actividadnan cu ta ser desroya. Direccion di Finansas en cooperacion cu Banco Central, lo yuda haci e evaluacion financiero aki.

Basa riba nos programa electoral nos capacidad y e integridad di nos integrantenan, Movimiento Electoral di Pueblo ta keda e unico alternativa pa un futuro garantisa. Contando riba bo sosten y sperando cu bo lo duna bo sirbidornan bo confiansa un biaha mas, mi ta termina cu;  
Un saludo victorioso y cordial.

Nelson Orlando Oduber  
Lider di MEP



**100% MEP**

# Asuntonan General

## Structura Estatal

Un di e desaroyonan cu ultimo añanan mas y mas ta bin dilanti, ta e echo cu Hulanda, compara cu añanan atras, ta hungando un rol sumamente activo den asuntonan di Structura Estatal, hopi biaha, neglizando nos Statuut, cu ta e instrumento legal cu ta reglamenta e areanan estatal entre Aruba, Antiyas Hulandes y Hulanda.

Regularmente Aruba a mustra Hulanda riba e hecho cu nos ta partner igual den Reino Hulandes y cu Hulanda, a base di Statuut, no por mete sin mas den asuntonan interno di e islanan.

MEP ta insisti riba un cooperacion cu Hulanda a base di respet mutuo. Den cuadro di esaki, MEP kier un discusion profundo cu Hulanda riba articulo 43 di Statuut pa mustra e gobierno Hulandes cu Hulanda y sigur Tweede Kamer, no por papia pa Aruba bou di ningun circumstancia. Tanten cu no tin asuntonan di gobernacion cu a bay robes, Conseho di Ministro di Reino, NO por usa articulo 43 di Statuut sin mas.

MEP ta compromete su mes pa cumpli cu Statuut y respeta e derecho di autodeterminacion di cada pais den Reino.

MEP lo sigui insisti riba un relacion cu paisnan den Reino, basa riba respet mutuo y cooperacion entre e gobiernonan. MEP ta para riba un relacion cu Hulanda, manera acorda den e acuerdo di 1983, cu ta e base di nos Status Aparte.

Pa loke ta trata nos relacion cu Union Europeo, MEP ta opta pa un asociacion como LGO (Landen en Gebieden Overzee) estilo nobo, manera describi den e "Groenboek" y publica door di Comision Europeo. Den e relacion aki, Aruba mes ta determina su organision di estado y maneho nacional y ta combini cierto areanan di cooperacion cu Union Europeo. Otro formanan di cooperacion, manera UPG (Ultraperifere Gebieden), ta wordo rechasa, pasobra den esaki Aruba mester adapta henter su sistema legislativo na esun di Union Europeo y mester paga contribucionnan fiscal hopi halto na Union Europeo, sin cu Aruba por disfruta di e beneficionan financiero, pasobra nos nivel di entrada nacional ta mucho halto, segun e normanan cu Union Europeo ta uza. Pues, aki Aruba tin obligacion so, sin beneficio financiero-economico.

## Telecomunicacion y Energia

MEP ta para riba y lo hiba un maneho alrespecto pa garantisa cu tanto Setar, WEB y Elmar ta keda cien prociento den man di pueblo.

MEP lo haci tur locual ta posibel pa e companianan publico introduci reglanan di "corporate governance" pa asina evita mal uso di poder pa tanto accionista, como huntia di comisarionan y directornan.



## **Maneho di Inovacion y Tecnologia Nobo**

MEP ta para pa inovacion ariba tur tereno na unda gastonan por ser minimalisa pa pueblo y gobierno. Teniendo na cuenta cu prijs di petroleo ariba mercado mundial ta fluctua y ta depende di demanda di petroleo di paisnan grandi, Partido MEP a cuminsa cu diferente proyecto piloto manera e molinanan di biento na Vader Piet pa purba haya un mescla den maneho di energia. Como un pais cu tin solo, biento y lama como recusonan natural, partido MEP ta kere cu ta imperativo pa bin cu un maneho na unda cu ta bai bin un mescla den uso di energia den cual ta reduci e importacion di petroleo di 100% pa 70 % na año 2015. Fueru cu esaki ta baha e gasto di importación, esaki tambe ta yuda nos medio ambiente. E reducción aki ta cumpli tambe cu e punto di salida pa cu un desaroyo sostenible y duradero. Pa logra esaki nos ta bay a haci lo siguiente:

- Elimina reglanan cu ta obstaculisa introduccion di uso di energía alternativo;
- Yuda WEB Aruba N.V. realisa plan Energia 2025 y sigui traha riba otro alterna tivanan pa elimina nos dependencia riba petróleo
- Busca manera pa yega na gas natural na un prijs mas reduci, pa remplasa e gastonan halto di petroleo
- Introduci incentivonan fiscal y economico pa esnan cu ta inverti den energia solar
- Introduci incentivonan fiscal pa inversion den industrianan ( p.e. WEB, Elmar, Refineria) cu ta produci y fomenta uso di energia alternativo
- Evalua si por bini cu iluminación den barionan por medio di energia solar.



## **Aparato Gubernamental y Good Governance**

MEP lo stimula pa su empleadonan sigui cursonan di upgrading pa asina crea mas conocemento y eficiencia den e aparato gobernamental.



Normanan di "good governance" lo ta e guia pa tanto mandatarionan, como empleadonan publico.

MEP lo stimula e introduccion di un databank den cual informacionnan di importancia general ta bira accesible, respetando e derecho di privacy di e ciudadano.

## Husticia y Seguridad

MEP ta para pa un pais democratico pa medio di un estado di derecho. Fortificacion di nos estado di derecho ta un gran prioridad di MEP. E siguiente pasonan ta necesario pa logra esaki:

- Institui un cuerpo di seguridad special, bou mando policial, encarga en particular cu casonan di atraco y ladronicia;
- Aumenta seguridad den nos pais y combatí traficacion di droga cu tur fosa;
- Pa loke ta trata nos Cuerpo Policial, nos lo sigui cu e programa acorda cu Hulanda pa upgrading di e cuerpo y comberti nos Cuerpo Policial den e miho cuerpo den Caribe;
- Direccion di Legislacion lo wordo equipa cu mas hurista riba tereno di wetgeving pa asina leynan nobo por wordo traha y adapta mas liher cu ta posibel;
- Gobierno lo inverti den optimalisacion di e sistema di computer pa e personal di Gerecht in Eerste Aanleg. Lo percura tambe pa personal capacita y necesario den e organisacion aki.



## Maneho di Extranheria y Imigracion

MEP ta para pa un crecimiento responsabel di nos poblacion. Na 2006 e Ley di Admision (LTU) a ser cambia.

**100% MEP**

For di principio Gobierno a bisa cu lo evalua e LTU. E concepto di cambio di LTU ta cla. Esaki ta basa riba recomendacionnan di tur stake-holders. Alavez riba 1 di agosto 2009, a bin na vigor e "Landsbesluit Houdende Algemene Maatregelen (lbham) Beroepspersonen", na unda excepcion ta ser haci riba varios funcion, particularmente pa empresasan grandi, e.o. hotelnan y e refineria. Esaki lo bay haci posibel pa den cierto caso y pa cierto funcionnan lo ta posibel pa haya un permiso pa 3 año di baha. E dunador di trabow mester paga pa e 3 añanan den un baha tambe. Asina ey ta alivia tanto e departamentonan como e dunador di trabow, pasobra na un banda e departamento no mester di atende tur año cu tur peticion di nobo y e dunador di trabow tampoco mester bay tur año na DIMAS y DAO pa haci peticion pa un permiso.

Alavez, lo bay bin cu un estudio pa determina si lo por amplia e lista di e funcionnan pa cual por haya excepcion pa 3 año, esaki den consulta cu tur esnan envolvi.

### **Integracion**

Despues cu hopi a ser haci riba tereno di imigracion, pa un crecimiento responsabel, na unda a percura pa cada ciudadano cu ta biba riba e pida baranca aki, por tin un calidad di bida halto, awor lo bin cu programanan extenso di integracion pa tur esnan cu a bin yuda nos den nos desaroyo. E integracion aki ta fundamental y indespensabel pa por tin un sociedad na unda ta reina igualdad y fraternidad. Pa integracion ta un exito, e individuo of grupo mester por integra y e comunidad mester crea y duna e espacio necesario pa integracion ta exitoso.

### **Economia y Turismo**

Gobernacion di MEP semper a percura pa un crecimiento sano y equilibra di nos economia. Sinembargo, e crisis economico mundial cu a cuminsa mustra su influencia desde final di 2008, tin su efectonan riba nos economia y empleo. Te asina lew gobierno a logra di limita e efectonan negativo aki mas tanto cu ta posibel.

Expertonan economico y financiero internacional ta di opinion cu e crisis economico por sigui un tempo mas. Pues lo no ta facil pa mantene un crecimiento economico durante e periodo aki. E gobernacion di MEP pa tal motibo lo haci tur su esfuerzonan pa, a lo menos mantene e situacion economico riba e nivel cu e ta awor y unda cu ta posibel, fortifica esaki aun mas.

MEP pa medio di su candidatonan integro, capacita y cu experencia, ta e unico partido politico na Aruba cu ta prepara pa enfrenta e retonan cu e desaroyo economico mundial lo trece cu n'e den e siguiente periodo di gobernacion.

Pa alcansa su metanan, MEP lo dirigi su gobernacion riba e siguiente aspectonan economico:





## ***Inversion y Diversificacion di nos Economia***

MEP lo pone mas enfasis riba e sectornan cu nos kier desaroya pa nos yiunan y yiu di nos yiunan y cu lo fortifica nos base economico. Banda di nos mercado tradicional manera turismo, tin diferente mercadonan pa explora, manera esun di servicionan finanziiero, servicionan legal, energia alternativo, etc. cu por trece un base sostenibel pa nos economía.

E crisis economico mundial a pone inversion internacional baha drásticamente. Motibo principal ta cu institutonan financiero a limita nan prestamongan, como cu nan ta prefera di keda cu nan medionan di liquidez den caso nan lo por hanja nan mes den dificultad financiero. Cu e conocemente aki, MEP lo haci tur loque ta posibel pa stimula inversion priva den nos economía, pa evita cu nos tasa di empleo lo baha. Sin afecta nos reservanan di divisa na Banco Central, MEP lo stimula consumo particular tambe, pasobra esaki ta un fuente importante di nos entrada nacional y como tal ta mantene empleo. Gobernacion di MEP lo pone tur atencion riba inversionistanan cu lo kier contribui na diversificacion di nos economía y asina crea cuponan di trabou cu ta duradero. Diversificacion tambe mester tuma luga den sector di turismo. MEP lo hiba un strategia y maneho cu lo ta basa riba principionan responsabel. Pa tal motibo MEP:

- lo involvi partnernan social den formulacion di su maneho economico y di inversion, manera Camara di Comercio, ATIA, sindicatonan etc. Participacion ta bay hunto cu e responsabilidad pa cu ehecucion di locual a ser combini;
- lo crea un Centro di Información pa inversionistanan;
- lo stimula comerciantenan local chiquito, entre otro piscado, cosedo y mecanico, pa habri nan propio negoshi;
- lo introduci un sistema di financiamiento atractivo y pagabel pa inversionistanan chiquito.
- lo evalua apertura di un banco pa inversionistanan chiquito; pa un suma di inversion menos cu 150 mil florin (micro credito), incorpora bou di Volkscredietbank y/of AIB.

**100%  MEP**

## **Stimula inversion publico**

Como medio pa limita e efecto di e crisis económico mundial mas tanto cu ta posibel, MEP lo:

- Acelera inversionnan publico;
- Stimula inversión den vivienda social;
- Stimula inversión den edificacionan nobo di gobierno;
- Intensifica un programa di mantenimiento di propiedadnan gubernamental;
- Stimula drechamento di careteranan y areanan publico;
- Inverti den arte publico di nos artistanan local, manera productonan di arte riba plazanan publico y den nos hotelnan;
- Drecha medio ambiente y landscaping den areanan publico.



## **Reduci desempleo**

Door di e crisis económico mundial e nivel di desempleo por bay crece. Por a nota cu inversionnan a tranca como cu demanda internacional a baha y a bira dificil pa financia inversionnan pa medio di banco. Mundialmente e tendencia ta pa wanta inversionnan na e momentonan aki. Pa tal motibo desempleo ta crece y demanda ta baha. MEP lo haci tur su esfuerzo pa kibra e circulo vicioso aki. Ora empleo crece, demanda lo subi y inversionnan por tuma luga atrobe. Pues MEP lo tuma acción pa:

**100%  MEP**

- Crea cuponan di trabou pa tur nos ciudadanonan cu por keda sin empleo;
- Sigura trabou di nos ciudadanonan, y no otorga permisionan di trabou na trahadornan di pafo di Aruba, mientras cu tin ciudadanonan aki mes pa eherce e funcionnan ey;
- Stimula esnan cu ta sin trabou pa registra na Job Center, pa asina purba di emplea of re-emplea nan mas lihe cu ta posibel, prome cu importa mas tra hado

## **Turismo**

- Analisa periodicamente e mercado di turismo y intensiva mercadeo di turismo pa Aruba for di e paisnan cu mas perspectiva;
- Dirigi mercadeo mas tanto riba turismo cu entrada halto;
- Pone mas atencion riba e paisnan cu moneda mas fuerte, esta e paisnan Europeo cu ta dispone di euro;
- Stimula inversion den y renovacion di nos hotelnan, pa upgrading di e producto turistico;
- Garantisa suficiente vuelongan internacional pa Aruba cu tarifanan aceptabel;
- E derechonan di e trahadornan den e sector turistico lo ser garantisa pa ley.

## **Controla costo di bida**

MEP lo sigui desaroyo di nos prijsnan di productonan pa consumo riba mercado y lo hiba un maneho pa stabilisa prijsnan di e productonan aki, pa asina mantene of aumenta e forsa di compra di cada ciudadano Arubano. Como tal MEP lo:

- Stimula control di prijs di productonan pa consumo door di Direcccion Economico y Comercio y pa medio di Fundacion CAS. Ya caba governo actual di MEP a tuma pasonan importante door di equipa CAS mihor pa por eherse su trabou di controla prijsnan di productonan pa consumo;
- Sigui stimula mercado liber, pero lo bin cu sancionnan severo contra esnan cu ta abusa di situacionnan di mercado, den casonan di monopolio of otro poder riba mercado;
- Amplia control di prijs di productonan di consumo door di añadi mas productonan den e canasta di producto cu ta wordu controla pa instanci anan official.



## **Finansas Publico**

Gobierno di MEP a logra di mehora e equilibrio den su presupuesto den sentido cu e a logra di tene su deficitnan bou di e margen internacional di tres procento di producto domestico bruto y hasta a sa di crea surplus. MEP a alcanza di baha debe nacional te na mas o menos cuarenta y dos procento di e producto domestico bruto. Sinembargo, e situacion financiero ta keda vulnerable. Como tal gobierno di MEP lo hiba e siguiente maneho financiero:

### ***Baha gastonan di gobierno na un manera responsabel***

- MEP lo crea mas equilibrio entre e gastonan y entradanan di gobierno, sin kita hende for di trabou;
- Trece mas eficiencia den e aparato gubernamental y aumenta diciplina den sector gubernamental;
- Mehora servicio di departamentonan gubernamental, introduciendo cursonan obligatorio di trato cu cliente, automatisacion y otro cursonan pa empleadonan publico por sigui desaroya nan mes y duna mas y mihor servicio.

### ***Trece un reparticion mas husto di e peso di impuesto***

Pa alcanza un peso di impuesto husto MEP lo:

- Introduci un sistema di impuesto mas husto pa crea un reparticion di e peso di impuesto mas balansa;
- MEP lo evalua pa coba BBO na un forma mas efectivo y preveni pa maluzo wordo hasi di e impuesto inderecto aki;
- Crea un sistema di incentivonan fiscal pa stimula economia;
- Equipa Servicio di Impuesto y Aduana (SIA) pa nan por eherce controlnan debido, pa manda cobransanan na tempo y cobra locual mester wordo cobra na tempo y na un manera servicial;
- Baha prima di AZV pa pensionadonan;
- Aumenta suma di deduccion pa esnan riba 60 aña, e asina yama "ouderenaftrek", te na un suma di Afl. 12.000,00;
- Introduci un forma di pensioen obligatorio pa tur trahado, di tal forma cu e trahador por sigui contribui den e fondo, tambe ora di cambio di trabou pa un otro empresa;
- Studia posibilidad di baha impuestonan directo, manera impuesto riba ganashi (winstbelasting) y impuesto riba entrada (inkomstenbelasting) y cambié pa impuestonan indirecto.



## **Maneho di Enseñansa, Cultura, Asuntonan Social y Infra-structura**

MEP como un partido social democrata ta kere firmemente cu Gobierno su responsabilidad y compromiso ta pa brinda pueblo e servicionan necesario pa logra oportunidad igual pa tur hende cu ta biba na Aruba, particularmente esnan mas vulnerabel.



MEP como un partido social democrata su obhetivo ta pa reforma nos comunidad democraticamente atraves di mantencion di ordo den Gobierno como tambe creacion di un programa cu ta traha pa elimina inhusticia social y deficiencia. Solamente asina Pueblo, esta tur hende cu ta biba na Aruba incluso esnan mas vulnerabel, e clase trahador cu ta consisti di tur cu ta traha duro pa gana su pan dignamente, sea den pacus, bao solo cayente of den airco di oficina, por logra crece den bida y logra prosperidad, p'e, su yiunan y henter su famia.

### ***Maneho di Enseñansa***

Enseñansa ta un di e prioridadnan mas importante y e forma principal pa garantisa un mihor futuro pa nos yiunan y pa nos Aruba. MEP ta wak inversion den enseñansa como un aspecto cardinal pa mantene y hisa calidad di enseñansa.

**100%  MEP**

Maneho di enseñansa a conoce hopi mehoracion bao Gabinete Oduber III y IV especialmente cu introduccion di e Plan Nacional di Enseñansa. Implementacion di e Plan Nacional di Enseñansa apenas a cuminsa na 2008 y e mester sosten total di un Gobierno stabil y continuo, pa logra su exito te cu 2017.

Atraves di e Plan Nacional di Enseñansa, MEP lo logra pa nos yiunan mañan ta prepara pa un mundo cu ta cambia constantemente y cu ta exigi mas y mas pa nos por siña lihe y continuamente.

Lo stimula y amplia posibilidadnan pa enseñansa pa adultonan y lo promove educacion permanente, esta "life long learning".

MEP su maneho di enseñansa lo ta dirigi pa crea un fundeshi pa enseñansa den cual: E studiante mester ta e punto central den enseñansa. Esaki ta ensera por ehempel: un plan di estudio individual, klasnan chikito, libertad di expresion, programa di recuperacion pa studiante cu ta cay afor, programanan di enseñansa acelera, reconoce y valora talentonan di e studiante.

Nos sistema lo implemente strategianan multiple pa garantisa exito di e studiante.

E ambiente na scol mester ta sigur y stimulante pa studiante, maestro y mayor. Esaki ta encera por ehempel, un edificio atractivo, accesibilidad, bon ambiente, maestronan dedica y un maneho di edificio/ facilidadnan cu garantia di seguridad, mantencion y hygiene.

E familia mester ta mas envolvi den educacion y den educacion di su yiu. Esaki ta nifica especificamente: mayornan por drenta den scol facil, mayornan ta asisti den enseñansa, mayornan ta bon informa di actividadnan di scol, tin consultacion (dialogo) regular cu mayornan, ta existi momentonan di reflección/ evaluacion entre mayornan y maestronan, ta existi un asociacion di mayor (ouder commissie), ta existi workshops pa mayornan, ta existi actividadnan social cu e familia, ta existi "open dagen", oportunidad ta ser crea pa mayornan ta envolvi den e desaroyo di e curriculum.

Mas envolvimento di gremionan.

E scol mester funciona manera un comunidad cu ta enfocariba calidad. Esaki ta ensera por ehempel: un espacio keto cu biblioteca y computer unda studiantenan por studia frankil durante y despues di oranan di scol, posibilidad pa haci deporte, arte, musica, etc. E edificio di scol mester por conta cu facilidadnan multi funcional.

Concretamente e puntonan aki ta encera por ehempel entre otro cu tur material necesario mester ta disponibel pa tur alumno, Gobierno lo duna mas atencion na resultado y calidad di e enseñansa, implementacion di Ley di Enseñansa Obligatorio, campaña nacional di Enseñansa, alternativa pagabel pa educacion avansa na por ehempel Merca, mehoracion di IPA , expancion di Universidad di Aruba y mas posibilidad di estudio na Aruba mes.

Crea incentivonan por ehempel fiscal pa mitiga e efecto di debe cu e studiante tin despues di su estudio.

Lo crea un database di nos profesionalnan den exterior pa di tal forma cu por sigui utilisa nan experticio pa cu desaroyo di nos pais. Un cu otro den un cooperacion estrecho entre Departamento di Enseñansa, Arubahuis y organizacion di profesionalnan y di studiantenan den exterior.



## **Pa locual ta trata nos Cultura**

- Stimula interes den nos cultura pa medio di enseñanza na scol y workshop pa hoben y grandinan
- Educa nos hendenan pa siña aprecia arte en particular di nos mes artistanan mas
- Crea centronan pa nos artistanan, escritornan, pintornan, artesanongan, etc., tin un espacio pa nan por eherse nan trabou, y expone nan talento
- Inverti mas den arte y parquenan, por ehempel decora nos rotondenan, hotelnan y parquenan cu arte di nos propio artistanan.

## **Maneho Social**

Gruponan vulnerabel den nos comunidad ta esnan cu mas liher por bira victimas di un situacion social dificil, manera pobresa, marginalisacion of discriminacion. Bou grupo di personanan vulnerabel nos ta comprende entre otro: mucha y hobennan, personanan cu limitacion, nos grandinan, famianan den dificultad y personanan cu ta sufri di desigualdad pa motibo di nan sexo.

Pa mehora e situacion y desaroya mas oportunidad pa gruponan vulnerabel, MEP lo sigui traha riba implementacion di un maneho social holistico. Un maneho social holistico ta considera situacionnan social completo, envez cu solamente ta mira aspectonan isola di un situacion.

Den cuadro di esaki e enfoke lo keda riba programa y proyectonan cu ta dirigi na hisa calidad di bida pa esnan na Aruba especialmente pa gruponan mas vulnerabel. P'esey lo sigui enfoca ariba hisa calidad di bida di nos muchanan, nos hobennan, esnan cu limitacion y famiyanan den situacion dificil, hende muher den dificultad, esnan sin trabow y nos ancianonan.

### **- Desaroya calidad di cuido y servicio pa esnan di 0 pa 12 aña.**

Mas y mihor cuido pa muchanan. Basa riba e Ley di Centro di Cuido lo traha pa hisa calidad di e cuido pa esnan entre 0 pa 12 aña. Esaki dor di fortifica centronan di cuido y programanan di sosten.

Identificacion di problemanan cerca e mas chikitinan (Vroegtijdige onderkennung). Lo traha na un forma integral pa identifica problemanan di desaroyo y problemanan psycho-social cerca nos muchanan mas tempran cu ta posibel.

### **- Desaroyo di cuido y guia pa esnan entre 13 y 18**



## **Centro Ortopedagogico.**

Un centro ortopedagogico pa hobenan entre 13 y 18 año pa duna guia na hoben cu problema di conducta (cu riesgo grandi pa drenta den criminalidad). E centro aki a wordo habri pa por atende e casonan mas urgente cu no por a wordo atende den otro instituto. Sinembargo e demanda pa e grupo di hobennan aki ta mas grandi ainda. P'eseys lo bai over pa habri un centro ortopedagogico cu internado y facilidadnan escolar, cu por acapara un grupo mas grandi di hobennan cu problema di conducta.

- Programma pa guia y stimula actividadnan recreativo pa hobennan.
- Lo haci un sondeo di kiko e necesidadnan ta y lo usa infrastructura existente rond di cual por structura programanan di desaroyo pa hobennan den nan tempo liber.
- Programa pa guia mayornan den nan rol di lanta y guia nan yiu. E mayornan ta esnan prome yama pa asumi nan responsabilidad pa cu nan yiunan.
- Educa mayornan den nan rol como mayor pa nan por duna e guia mas adecuado posibel na nan yiu. Di un banda esaki ta resulta den famianan mas uni y di otro banda ta yuda preveni problemanan di comportacion y problemanan psycho-social cerca muchanan/hobennan.

## **- Fortificacion di servicionan pa preveni y combati abuso contra menor**

Gobierno lo cera protocolnan di trabao y di cooperacion cu instancianan riba e tereno aki pa traha di un forma estrecho y structura pa por atende casonan di negligencia y di abuso contra menor.

Duna fundacionnan manera Guiami, Sostenemi, Respetami, Fundacion pa nos Muchanan mas "tools" y autoridad pa por actua y interveni na unda cu ta necesario.

Crea programanan (campaña) mas agresivo pa preveni abuso di mucha den tur sentido.

Igualmente mester conta pa Voogdijraad. E instancia aki mester tin e posibilidad pa tuma un postura mas activo na momento cu ta trata di defende derechonan di mucha. Un manera pa logra esaki ta pa pone mas personal disponibel y treciendo cambionan den nos leynan. Mester sigui desaroya e programa di reorganisacion di Directie Voogdijraad y lo implementa e plan di reorganisacion pa mehora e trabao y servicio.

## **- Servicio di conseho di finansas personal (schuldhulpverlening)**

Como cu na Aruba famianan e individuonan ta haña nan mes den situacion financiero dificil dor cu nan no tin eabilidad pa maneha nan financieran den un manera adecuado of cu nan ta hañanan den situacionan financiero dificil ocasiona dor di cambionan den nan bida, sea perdida di trabao, divorcio, of fayecemento den familia, lo bin cu un servicio pa duna sosten pa dunanan e hermentnan pa nan mes por sali for di e problemanan financiero.



### **- Cupo di trabao alternativo**

Como cu tin persona cu tin dificultad pa drenta e mercado laboral, manera esan cu ta ricibi bijstand, lo bin cu mas programa di re-integracion manera esnan di Pathways to Independence, na unda Departamento di Asuntonan Social ta traha conhuntamente cu departamento di Labor y sector priva pa por brinda e personanan aki cuponan di trabao.

### **- Cupo di trabao Social**

Programanan special pa esnan cu limitacion por tin un trabao apesar di nan condicion. Lo bin cu mas programa specialisa pa asina por crea trabao ahusta na e nivel di e personanan aki y hisa nan calidad di bida.

### **-Mas y mihor cuidoo specialisa pa esnan cu limitacion**

E centro di cuidoo cu lo bin na San Nicolas lo incorpora un seccion pa esnan cu limitacionnan multiple. E centro lo duna posibilidad na un cantidad di 20 persona pa ta interno y na un cantidad di 25 persona cu limitacion pa haña un cuidoo den dia. A duna prioridad pa focus riba e grupo aki den gobernacion pasa, como cu esaki tabata un necesidad hopi grandi. Sinembargo ainda tin varios grupo di esnan cu limitacion cu mester di atencion y cu lo haña prioridad den e proximo gobernacion.

- Cuido pa esanan cu limitacion cu ta wordo neglisha of maltrata.
- Miher cuidoo pa gruponan cu limitacionnan special manera autistanan.
- Cuido integral pa esnan cu limitacion mayor di 18 aña, incluyendo aumento den capacidad pa guia mediante actividadnan den dia y aumento den capacidad pa internacion.

### **- Cuido specialisa y adapta pa esnan di edad mas avansa**

Pa esnan di un edad mas avansa lo bin cu mas programa y actividadnan mas cerca di nan cas pa nan por tin un embehecimiento activo.

E contrucción di e Centro di Cuido na San Nicolas y e mehoracionnan cu ta tumando lugar na St. Michael Paviljoen, ta ensera cu tin mas hende di edad avansa cu lo por wordo interna y haya cuidoo di 24 ora.

Cas pa anciano den parti central y norte di Aruba. Lo evalua si e formula di e cas di anciano ta funciona bon y a base di eseys lo por bin cu Centro di Cuido na otro partinan di Aruba.



### **- Programa integral pa prevencion di problemanan social den nos comunidad.**

Lo bin cu varios programa di concientisacion pa yuda preveni problemanan den comunidad y pa logra cu nos habitantenan ta mihor informa con pa anda y drecha situacionnan cu nan ta aden.

Departamento di Asunto Social, Voogdijraad y diferente instancia social lo bin cu un maneho integral pa traha riba programanan di prevencion.

### **- Drecha e ambiente di bida den distritonan na Aruba**

Programa integral entre Departamento di Asunto Social, FCCA y otro instancianan concerni pa sanea e ambiente den distritonan cu barionan problematico y pa mantene of crea un mihor ambiente den e barionan.

Un programa di integracion. Pa trece mas harmonia den bario, lo traha riba educacion di esnan cu a bin biba aki na Aruba den nos costumbernan local y bin cu programanan di integracion pa logra cu tur habitante den e bario ta biba den harmonia cu otro.

### **- Fortifica e capacidad di e Centronan di Bario**

Lo bin cu programa y actividadnan mas adapta na e demanda y necesidadnan cu ta existi den e barionan.

E Centro di Bario lo ta e centro pa educacion y formacion continuo pa habitantenan di e barionan.

### **- Fortifica y modernisa maneho di genero**

Lo crea un organo fuerte cu lo incorpora maneho di genero den e diferente ministerion y departamentonan, pa pone mas atencion arriba e disigualdadnan cu ta existi den ley, trato y benificacion entre genero y bin cu solucionnan integral pa cu esaki.

Un maneho cu ta pone atencion riba e diferente problemanan cu ta regarda hende muher en particular discriminacion contra hende muher, violencia contra hende muher, asuntunan di traficacion di persona y prostitucion.

### **- Fortificacion di servicio por medio di capacitacion y re-capacitacion di e aparato gubernamental y instancianan no gubernamental**

- Desaroya un maneho integral cu participacion di e diferente gruponan di atencion
- Lanta un organo cu ta coordina “deskundigheidsbevordering” na un forma continuo, basa riba necesidadnan den comunidad
- Lo crea un programa integral di registracion di datos.
- Fortificacion di intercambio di informacion entre ministerionan, instancianan y organizacionan, tambe pa cu clientenan.
- Lo crea un organo special pa coordina e servicio entre instancianan aki.
- Ley pa cuido di largo duracion (manera ley labishan/AWBZ na Curacao) lo bin na vigor
- Subsidieverordening. Renoba e ley existente di subsidio pa e cuadra mas cu e exigencianan di nos comunidad.



- Decreta un ley di pensioen pa tur trahado, en particular pa esnan cu ta traha na e instancianan no- gubernamental.

- **Fortifica e nucleo familiar**

- Cambia nos leyan pa proteha famia y matrimonio
- Introduci posibilidad pa traha 'part time' riba un base voluntario; mayornan cu ta desea di pasa mas tempo cu nan yunyan p.e. por haci uso di esaki.

## Maneho di Infrastructura

Un bon infrastructura ta necesario pa crecimiento economico permanente y pa garantisa un mihor uso di recursonan di Aruba. Un bon infrastructura ta importante y ta contribui na desaroyo econmico cu mester cuadra cu e necesidadnan social, demografico y di medio ambiente.



**100% MEP**

MEP su objetivo ta pa infrastructura di Aruba ta di un calidad halto y cu un base amplio pa carga e crecimiento di poblacion y actividadnan economico. Pues, un bon infraestructura ta stimula aumento den inversion, creacion di cuponan di trabao y consequentemente entrada mas halto. Tur esakinan ta hiba na elevacion di condicionnan di bida di tur hende y reduccion di pobresa.

Infrastructura ta esencial pa logra oportunidadnan di desaroyo realistico pa Aruba riba diferente tereno, manera desaroyo economico, salubridad publico, comunicacion di zona, espacio pa vivienda, etc.

Den cuadro di desaroyo di infrastructura, MEP, ademas di pone tereno disponibel pa construccion di vivienda pa nos pueblo, construi caretera den tur area na Aruba y instala servicionan di utilidad manera awa, coriente y telefon, tambe kier desaroya nos Infrastructura di un forma cu ta logra otro objetivonan manera:

- Hisa accesibilidad di centronan comercial pa eleva e eficiencia di actividadnan comercial.
- Mehora comunicacion entre zonanan pa entre otro aumenta actividadnan comercial.
- Hasi mihor uso di nos recursonan, manera recursonan natural y humano en especial den comparacion cu regionnan of islanan cu ta competi cu Aruba.

Concretamente e objetivonan aki ta hibanos na mas trabao di construccion y mantenicion di caretera, tanto den zonanan residencial, comercial y industrial, como riba camin danan principal.

Tambe e ta hiba nos na mas trabao di construccion di vivienda pa cumpli cu e demanda grandi riba e tereno aki, revitalisacion di nos centro di Oranjestad y San Nicolas y un maneho husto transparente encuanto reparticion di tereno, pa cada ciudadano por cumpli cu su derecho di construi su propio cas.

Na final nos infrastructura mester ta di un calidad halto y cu un base amplio, pa carga e crecimiento di nos poblacion y facilita actividadnan economico.

## **Salubridad Publico, Bienestar General y Deporte**

### **Salubridad Publico.**

Como partido social demócrata, salud di nos pueblo ta na promer lugar. Pa mehora e servicio e siguiente puntonan mester wordo tuma na cuenta:

- Aumenta e calidad di e servicio medico na un nivel mas halto posibel.
- Percura pa mas dokternan di cas den cada barrio pa asina e dokter por ta mas cerca di nos hendenan.
- Mehora servicionan y reduci e tempo pa warda riba servicio, esaki ta bira posibel ora nos Hospital na San Nicolas cuminsa funciona, y trece mas specialista Aruba.



- Inventarisa cuanto dokter y ki sorto di specialistanan e pueblo di Aruba mester awor y den e añanan benidero. Lo traha un plan concreto pa ehecuta esaki.
- Inventarisa e tipo y sorto di medicinanan cu ta ser prescribi na Aruba y controla e fluho di remedii.
- Concientisa nos hendenan cu no ta pa tur cos chikito mester bishita dokternan di cas y concientisanan tambe riba uzo di remedii.  
E manera pa logra esaki ta dunando bon informacion riba un base continuo y eficiente.
- Concentra mas riba prevencion di malesa. Esaki lo ta un di e pilarnan di e maneho. Sobrepeso, Diabetes Mellitus, Presion, problemanan cardiovascular, ta ehempelnan di malesanan cu ta bin hunto y na cual mester wordo duna debido atencion.  
E manera pa trata e malesanan aki ta un cambio radical den nos manera di pensa tocante cuminda y ehrsicio. Esaki lo sosode por medio di e Centro Medico na Hospital na San Nicolas. Prevencion ta cuminsa cu un programa extenso di informacion. Pa medio di informacion constantemente pueblo lo wordo consentisa tocante su estado di salud.
- Lo inventarisa mas pronto cu ta posibel cuanto caso di diferente malesa cronico tin den nos pais, pa asina bin cu un plan di maneho dirigi riba prevencion y sanacion.

E plan di maneho ta consisti den esaki, cu esnan cu malesanan cronico mester sometinan mes na un control mas rigido via un team cu ta consisti di dokternan, enfermeronan, dietistanan, psycologonan, fysiotherapistanan, etc. Esaki ta encera tambe nan manera di come y movecion. Mester sigui cu e programanan riba e tereno aki di Departamento di Salud.



**100% MEP**

## **Bienestar General y Deporte**

Tur ciudadano mester ser concientisa di su propio responsabilidad pa actua den forman preventivo pa cu e cuido di su propio salud, bibando un bida sano;

- Stimula iniciativanan particular cu ta funciona y ta duna servicio medico na patientnan na cas.
- Inventarisa y modernisa e casnan di anciano y brinda servicio medico básico manera duna inyeccion, pone infuus, ect.
- Sigui inverti y garantisa mantenimento di lugarnan pa haci deporte, duna educacion fysico y recreacion y hasi e lugarnan pa haci deporte accesible pa tur hende.
- Enculca den nos pueblo e amor pa deporte pa medio di enseñansa, enfocando mas riba e deportenan olímpico, caminda e accentu ta riba competencia husto.
- Stimula nos deportistanan pa participa na deportenan internacional y representa nos país dignamente.
- Crea facilidadnan pa entrena nos ciudadanonan pa bira lidernan den deporte cualifica y diploma, por ehempel refree, trainer, coach etc.

## **Adiccion**

- Brinda Solucion pa Problema di Adiccion y Choller

E meta di partido MEP ta pa rehabilita, re-integra y resocialisa e adicto.

E “Landlopermodel” cu tur partido a acepta, ta den e fase di re-evaluacion, na unda tur aspecto di adiccion lo ser evalua. Asina nos conoce varios centro di rehabilitacion na varios sitio riba nos isla. E ubicacion di e centronan aki tambe ta forma parti di e evaluacion aki.

E problema di adiccion mester wordo ataca di diferente angulo:

- Combati traficacion di droga na Aruba cu man duro; e proximo gobierno di MEP lo cuminsa un guera fuerte contra traficantenan di droga
- Organisa campañanan di informacion mas agresivo y incorpora nan den e curiculum escolar, pa asina preveni adiccion. Stimula trabounan di organisa cionnan no-gubernamental riba e tereno aki bou coordinacion di “Bureau Drugsbestrijding”.
- Ataca problemanan social den famianan cu ta conduci na uso di droga.
- Pa loke ta trata e adictonan ambulante, nos lo baha cu man mas duro riba esnan responsabelpa importacion y benta di droga riba Aruba. Mes cos ta conta pa esnan cu ta forma un menasa pa nos seguridad. Lo percura pa cura nan di nan adiccion y rehabilita nan pa nan regresa den nos comunitad sanamente.



- Yuda famianan cu tin problema di adiccion. Pa esaki nos lo usa tur posibilidad cu ya ta existi, a corto plazo por ehempel e Fundacion "Adopt an Addict", mientras nos ta crea facilidadnan di rehabilitacion na Aruba mes riba termino mas largo. Esaki ta aplicabel tambe pa e adictonan ambulante ("choller"). Introduci un programa di rehabilitacion y re-ingrecion pa adictos ambulante mediante un proyecto di trabou, p.e. cultivo di berdura, labamento di auto, cuido di auto, limpieza di caya bou di guia. Esaki ta yuda nan haya back y eleva nan auto-estima.

## Mercado Laboral

### Diversificacion di Mercado

Diversifica e Mercado laboral Arubano door di atrae inversionistanan cu otro tipo di compania, pa asina crea otro tipo di trabounan di calidad (aparte di HORECA, Refineria y gobierno) p.e.:

### Companianan di Exportacion a base di e status LGO:

Companianan cu ta importa e base pa un producto p.e. di Sur America y ta haci un cambio di structura di e producto, pa despues exporta esaki pa Europa. E tipo di exportacion aki ta danki na e status di LGO cu nos tin actualmente. E beneficio ta sinta den e diferencia den invoerrechten cu mester wordo paga si exporta directamente for di e pais di origen.

### Cargo Transito a base di e status LGO:

transporte aereo di productonan ta posibel pa medio di e mes un sistema menciona arriba p.e. ta importa Flor for di Colombia ta lag'e pasa Aruba como transito y despues ta export'e pa Europa. Atrobe e beneficio ta sinta den e diferencia den invoerrechten cu mester wordo paga ora e producto drenta Europa.

### Turismo Medico:

Esaki ta algo cu ta creciendo cada dia mas rond mundo. Docternan Mericano promer cu hasi un operacion na Merca, mester paga un "liability fee" na seguro pa, si encaso algo bay malo y e docter worde demanda pa e patient pa miyones, e seguro por cubri e demanda. Turismo medico tin su base den e echo cu e docter of docternan ta lanta un clinica aki na Aruba pa haci operacion. E docter ta paga pasashi y estadia di e "patient" pa bin opera na Aruba y asina mes e ta sali mas barata cu e paga e "liability fee". Gobierno lo pone como condicion cu e dokter ta establece su mes aki na Aruba, tin cu opera patientnan local na un tarifa abou y asina AZV tambe ta sali benifica pasobra cu no tin cu manda p.e. patientnan cu tin cu opera pa exterior. Nan ta wordo opera akinan mes door di un dokter super cualifica.



### **Freezone:**

E movemento di e waf di carga pa Barcadera ta habri vianan nobo pa facilidadnan di transborde di productonan entre e continentenan Europeo, Lehano Oriente y America. Esaki lo bira aun mas interesante ora companianan establece nan mes den e freezone pa haci e cambionan structural di un of mas producto pa cumpli cu e reglanan di exportación cu ta pertenece na nos status di LGO.

### **Promove y sostene nos hobennan talentoso pa lanta nan propio negoshi:**

Gobierno por laga nos hobennan cu caba di studia of tin un of otro talento, traha un bussinesplan y entregé na Gobierno. Gobierno ta bay studia e factibilidad y e chens di un bon resultado y lo escoge p.e. 10 bussinesplan cada año y lo para garantia pa cu e sosten financiero y aconseha door di AIB. Gobierno lo keda sostene e hobennan aki mediante AIB, durante e periodo di "incubacion".

Tur e puntonan aki riba ta pa crea empleo di calidad y asina nos por minimalisa e dependencia laboral di e sector nan HORECA, Refineria y Gobierno.

## **Planificacion di espacio, medio ambiente y vivienda**

MEP ta para pa e hecho cu sin planificacion no tin desaroyo duradero. Basa ariba e hecho aki, MEP ta e partido cu a logra introduci Ley di Ordenansa Teritorial. Como partido nos ta conciente cu desaroyo y medio ambiente mester bay man den man. Desaroyo no por sigui tuma lugar sin tene cuenta cu recursionan natural, pues e cuido di medio ambiente mester cana hunto cu e desaroyo. Aña 2008 casi tur gobierno na mundo tin desaroyo duradero poni ariba su agenda. Esaki ta e solucion pa problemanan di cambio di clima, destruccion di nos ecosistema y biodiversidad, desperdicio y rosamento di tereno. Aunque cu Aruba como pais chiquito no ta e causante mayor di e problemanan ariba menciona den mundo, nos como partido MEP ta convensi cu nos mester sigui e tendencia mundial aki y tuma e pasonan necesario riba nivel nacional pa garantisa un desaroyo duradero y sostenible pa tanto nos hendenan como nos economia.

E pasonan cu MEP lo tuma ta entre otro :

- Sigui cu e implementacion di e Ley di Teritorio caminda "bestemmingsplannen" ta wordo mara na e Ley di Teritorio cu ya a wordo pasa den Parlamento
- **Vivienda:** MEP lo sigui cu e maneho pa construi casnan social pa diferente gruponan den comunidad (gruponan di menos recurso, gruponan cu limitacion fisico o mental y nos grandinan.) y sigui ofrece ayudo financiero pa compra y construccion di cas propio.
- **Fondo di caretera:** nos lo amplia e trabaonan di renobacion y mantencion di nos careteranan den cuadro di e Fondo di Caretera y di DOW.



Nos lo ehecuta entre otro e proyectonan di e caretera nobo di Cumana pa Eagle y di Pos Chiquito pa San Nicolas.

- **Maneho di tereno:** nos lo sigui cu e maneho nobo; husto, transparente y pro-activo pa otorgamento di tereno pa asina sigui alivia e situacion di vivienda y percura pa cada famia por yega na su propio cas.
- 
- **Edificacionan di Gobierno:** nos lo sigui cu e maneho pa construi edificacionan propio di Gobierno pa asina baha e gastonan di huur y mehora e servicio na publico.
- **Plan contra exceso di yobida:** nos lo sigui ehecuta e proyectonan di desague pa alivia e barionan cu ta sufri di e problema di inundacion.
- **Plan di embeyecimento:** lo amplia e plan di embeyecimiento di Oranjestad pa otro barionan y alavez lo crea mas facilidad den e barionan pa asina hisa calidad di bida den tur bario.
- Introduci un ley di medio ambiente caminda ta exigi tur projecto nobo pa presenta un rapportahe di e efectonan cu e ta bay tin riba nos medio ambiente.
- Evalua introducion di "statiegeld" pa evita sushedad rond di Aruba, especialmente riba boter y plastic.
- Pone polisnan ambiental pa controla e naturalesa y duna multa na esnan cu ta destrosa naturalesa.
- Stimula actividadnan regular den bario pa cu e cuido di nos medio ambiente.
- Stimula scolnan pa contribui na concientisacion di nos muchanan riba cuido di nos medio ambiente:
  - a) Bin cu programanan educativo den curiculo di scol, dirigi riba nos medio ambiente.
  - b) Concientisa comunidad en general pa recicla den un forma atractivo.
  - c) Stimula e muchanan pa planta y mantene un cunucu chikito (hoffi) na scol y/of na cas.



**100% MEP**



MEP ta un partido grandi y respeta cu peso politico y cu mas aña di experiencia den gobernacion cu tur otro partido politico aki na Aruba. A pesar cu desaroyonan economico mundial lo forma un reto grandi pa e periodo di gobernacion 2009-2013, nos ta compromete nos mes na ehecucion di nos programa. MEP ta consisti di homber y muhernan balente, cu experiencia, yen di energia y ideanan creativo y inovativo pa enfrenta tur reto di gobernacion. Den situacion di crisis economico mundial pueblo por confia e pais aki den man di un solo partido; esta

**Movimiento Electoral di Pueblo, MEP.**

**100%  MEP**



# **Dia 25**

# **Vota Lista 5**

# **pa Gabinete Oduber 5**

1. Oduber, Nelson Orlando
2. Tromp, Marisol Juliette
3. Croes, Evelyn Christina
4. Wever, Candelario Ambrosio Sixto Dionicio
5. Briesen, Edison
6. Swaen, Nilo Joseph Johannes
7. Thijssen, Juan Edberto
8. Ras, Melvin Glorinda
9. Maduro, Xiomara Jeanira
10. Kelly, Maikel Jacobo
11. Croes, Arondino Rigobertus Bertino
12. Romero, Crispin Valentino Junior
13. Giel, Carl Richard Anthony
14. Tevreden, Hendrik Wensley Gregory
15. Leo, Daniel Francois Pierre
16. Sintjago, Susanne Evelyn Maria
17. Marquez, Zulay Criseida
18. Maduro, Robert Marcelino
19. Arends, Valentino Enrique Junior
20. Cuba de, Vladimir
21. Croes, Gerrit
22. Coronel, Monique Irena Vanessa
23. Lacle, Ingela Jeanette Cristina
24. Briezen, Frank Marcelino
25. Lee, Tai Kong Hypert
26. Koolman, Joe Gregory
27. Jacobs, John Francis
28. Charles, Judith Dorothea
29. Ridderstaat, Franklin Anthony Gregory

**100% MEP**